

Ijaze Akili kwa Ukweli wa Mungu

Tena kwa hayo ametukirimia ahadi kubwa mno, za thamani, ili kwamba kwa hizo mpate kuwa washirika wa tabia ya Uungu, mkiokolewa na uharibifu uliomo duniani kwa sababu ya tamaa—**2 Petro 1:4.**

Ni wajibu wa kila mwana wa Mungu kuijaza akili yake kwa kweli za Mungu; na kadiri anavyozidi kufanya hivyo, ndivyo atakavyozidi kuwa na nguvu na uwazi wa akili ili kuelewa mambo mazito ya Mungu. Naye atakuwa na bidii na nguvu zaidi, kadiri kanuni za ukweli zinavyotekelezwa maishani mwake kila siku.

Kile ambacho kitawabariki wanadamu ni maisha ya kiroho. Yeye ambaye anapatana na Mungu, atamtegemea daima kwa ajili ya nguvu. “Basi ninyi mtakuwa wakamilifu, kama Baba yenu wa mbinguni alivyo mkamilifu.” Inapaswa kuwa kazi yetu ya maisha daima kutafuta ukamilifu wa tabia ya Kristo, tukijitahidi daima kupatana na mapenzi ya Mungu. Juhudi zilizoanzia hapa zitaendelea hata umilele. Maendeleo yanayofanywa hapa tutakuwa nayo hata tutakapoingia katika uzima wa milele.

Wale ambao ni washirika wa upole, usafi na upendo wa Yesu, watafurahia katika Mungu na wataangaza nuru na furaha kwa wote wanaowazunguka. Fikra kwamba Yesu alikufa ili kutununulia uzima wa milele, inatosha kuamsha mioyoni mwetu shukrani ya kweli na ya hali ya juu, na kutoa midomoni mwetu nyimbo za sifa kwa shauku kuu zaidi. Ahadi za Mungu ni nyingi, na kamilifu, na ni za bure. Yeyote atakaye, kwa nguvu za Kristo, kutii masharti, anaweza kudai ahadi hizi, pamoja na utajiri wake wote wa baraka, kama Zake. Na akiwa amejazwa kwa wingi hivyo kutoka katika nyumba ya hazina ya Mungu, anaweza, katika safari ya maisha, “mwenende kama ulivyo wajibu wenu kwa Bwana, mkimpendeza kabisa;” kuwa kielelezo cha uchaji Mungu akiwabariki wanadamu wenzake, na kumheshimu Muumba wake. Ingawa Mwokozi wetu angewalinda wafuasi Wake dhidi ya kujitumainia nafsi kwa ukumbusho, “Pasipo mimi, ninyi hamwezi kufanya neno lo lote,” Ameungana nalo kwa ajili ya kututia moyo na kutupa uhakikisho wa neema, “Yeye akaaye ndani yangu ... huzaa matunda mengi.”